



## ***Komunikadu Imprensa***

**Periodu : Jullu 2011**

**Edisaun : 13 Jullu 2011**

### **Bispo Diocese Baucau Mrg. Dom Basilio do Nascimento Rekoñese Komplexidade servisu JSMP nian iha Setór Justisa**

Iha loron 12 Jullu 2011, Programa de Monitorizasaun do Sistema Judisiáriu ka JSMP hetan oportunidade hodi halo audiénsia ho Amo Bispo Diocese Baucau, Mrg. Dom Basilio do Nascimento iha nia servisu fatin, *Câmara Eclesiástica da Diocese Baucau Timór Léste*. Audiénsia ne'e hahú husi tuku 11:00 - 12:30 OTL. Marka prezensa iha audiénsia ne'e JSMP ho ninia equipa hamutuk ema nain neen (6), no husi parte Diocese nian Amu Bispo rasik Mrg Dom Basilio do Nascimento.

Diretór Ezekutivu JSMP, Luis de Oliveira Sampaio, haktuir katak *hanesan mós audiénsia sira seluk audiénsia ida ne'e mós JSMP hala'ó ho objetivu atu mobiliza apoiu Igreja ba prosesu hari'í setór justisa, no troka impresoins entre JSMP no Igreja no entidades relijiozu sira seluk, tanbá JSMP nafatin konvensidu katak involvimentu kolektivu ba prosesu ne'e sei produz rezultadu ida ne'e diferente liu duque servisu ho kapasidade individu ka grupu deit.*

*Audensia ne'e, halo parte hanesan planu JSMP nian atu kontinua hakbesik ba ema hotu, tantu lori naran individu ka instituisaun atu halo esforsu kolektivu hodi hari'í no dezemvolve setór justisa ida ne'ebé bele fó fatin ba ema hotu, setór justisa ida ne'ebé independete, kredível, no asegura duni katak sidadaun nasaun ida ne'e goza duni sira nia direitu sira ne'ebé hatuur ona iha Konstituisaun da República.*

Similár ho audiénsia sira seluk<sup>1</sup>, JSMP uza mós oportunidade ida ne'e hodi informa ba Dom Basilio konabá istória oinsá no tanbá sá JSMP hari'í<sup>2</sup> no komitmentu JSMP nian atu promove justisa ba ema hotu.

---

<sup>1</sup> Lé mós JSMP nia audiénsia ho Mgr. Dom Alberto Ricardo, Bispo Dioseze Dili no audensia ho Prezidente Komuidade Islamika nian data diferente iha website JSMP nian iha rubrika publication.

<sup>2</sup> JSMP hari'í iha Abril tinan 2001 ho objetivu prinsipal atu observa prosesu ba julgamentu Tribunál Ad hock Jakarta-Indonesia relasiona ho julgamentu ba kazu krime graves 1999 no Tribunál Painel Espesial Krimes Graves iha Dili, Timór Léste no too agora JSMP sei eziste hodi kontinua hala'ó atividade monitorizasaun Tribunál sira iha Timór Léste no komitmentu luta atu hari'í Tribunál Internasionál.

Ba oportunidade ne'e, JSMP tenta atu atualiza prosesu dezenvolvimentu setór justisa ohin loron, tantu nia progresu ne'ebé atinze ona nomós dezafiu ne'ebé kontinua la'ó hamutuk ho esforsu ne'ebé halo ona setór ida ne'e.

JSMP mós subliña importansia husi setór ida ne'e iha kontestu komitmentu atu kombatê prátika korupsaun hanesan kestaun no preokupasaun sosiedade tomak. Tuir JSMP ho sistema justisa ida ne'e forte, abut-metin no kredível mak bele asegura katak autoridade estadu sira ezerse sira nia funsaun tuir regra no kumpri sira nia obrigaun ne'ebé hatuur ona ba sira nia leten hanesan servidór povu nian.

Liu tan, JSMP uza oportunidade ida ne'e hodi ható JSMP ninia preokupasaun sira ne'ebé relasaun ho asuntu violénsia hasoru feto, inklui kazu sira violénsia doméstika, violénsia sexuál no liu-liu kazu sira ne'ebé envolve vítima no arguidu ne'ebé iha relasaun besik ka koñesidu ho naran kazu *insestu* no kazu sira seluk tan ne'ebé afeita feto sira nia dignidade hanesan kriatura umana.

Depoisde rona tiha esplicasaun introdutoriú konabá istória prosesu hari'í JSMP nian no papel JSMP nian iha setór justisa durante tinan 9 nia laran ona, iha oportunidade ne'e Amo Bispo Dom Basilio do Nascimento hahú hodi haktuir katak tuir loloos nia la duun iha koñesimentu natoon konabá asuntu lei ka asuntu justisa nian ,tanbá ne'e nia haktuir katak reasaun ne'ebé mak nia manisfeta iha okaziaun balun ne'e nu'udar reasaun hanesan sidadaun bai-bain, ne'ebé harê no hanoin buat balu dala-ruma governu ka ema balu iha governu ida ne'e mak la kóhi duni justisa ne'e halo duni atuaun ruma.

Aleinde ne'e, Amo Bispo mós foti kestaun balun hanesan reflesaun interrogatóriu ida ema hotu katak tuir nia sistema justisa la-la'ó ne'e la'ós tanbá agente justisa nia ema mesak nurak, maibé ida ne'e dala-ruma tanbá iha orientasaun ka iha hanoin ida atu halo justisa ne'e la-la'ó duni. Amo Bispo kontinua preokupa katak setór ida hanesan ema ruma buti hela nia kakorok no halo instituisaun ida ne'e dada iis mós la diak.

Setór ne'e nu'udar baut dook ida ne'ebé kuandu ema ruma hakarak sukít sai buat dodok sira ne'e persiza duni komitmentu, korazem atu harê sasan dodok sira ne'e. Nune'é mós, nia rekoñese katak iha buat barak ne'ebé ligadu ho prosesu sira liu ba kotuk la justu , iha instituisaun balun ne'ebé hetan alegasaun komete aktu kriminál la hetan prosesu, maibé ema seluk hetan kondensaun ba alegasaun ba kazu hanesan.

Harê ba realidade hirak ne'e, Dom Basilio rekoñese katak setór ida ne'e nu'udar buat todan ida ne'ebé mak iha rai bar-barak la'ós buat ida *que* halo ema hotu kontente no basa-liman. Tanbá ne'e persiza ema aten brani atu kaer no dudu prosesu ne'e ba oin. Tanbá ne'e, mesmu servisu ida todan no komplexu maibé nia enkoraza nafatin JSMP atu kontinua servisu ne'e, atu kontinua hatenu, kontinua tata no tenki prontu mós atu simu risku sira seluk.

Iha asuntu barak ne'ebé deskute entre equipa JSMP no Dom Basilio hanesan faze inisiál no intrudotóriu no parte rua, no konkorda atu kontinua servisu hamutuk iha asuntu balun ne'ebé persiza hetan apoiu husi Igreja atu harê hamutuk.

Audiénsia ne'e taka ho intrega dokumentu publikasaun relatoriú sira JSMP nian, hanesan relatóriu observaun jerál setór justisa 2010 nian, relatóriu temátiku konabá kazu 11 de Fevereiro ne'ebé hakerek ho titlu Kazu 11 de Fevereiro ; Pergunta Barak-liu Duque Resposta no publikasaun sira seluk.

Atu hetan informasaun klea liu tan favor bele kontaktu :

Luis de Oliveira Sampaio

Diretór Ezekutivu JSMP

Diresaun-email : [luis@jsmp.minihub.org](mailto:luis@jsmp.minihub.org)

Telefone : 3323883/7295795